

四庫全書薈要

• 乾隆御覽本

集部

雁門集卷四

元 薩都拉 撰

過洪

奔流激長川百折怒未已
長年與水爭退尺進纔咫艱
哉力舟子觀可悟至理

和韻題石城峭壁

離宮長蓬蒿畫棟落花綵
翠華不復遊空餘石城在馬

蹄踏雲霞鳥聲隔烟靄老僧喜客來山中深似海

偕楊善卿丘以敬劉載民遊法雲寺以色即是空
分韻得卽字

駕言招提遊繫馬日之夕黍酒濃滴珠松風暗籠漆朝
士晝鳴珂山僧夜飛錫鳳臺錦袍人可望不可卽

病中寄卽休上人

牀頭藥裏列門外芳草榮庭閒午陰轉睡覺餘香清曹
吏日三謁幽鳥時一鳴豈不好馳逐但恐勞吾生

經姑蘇與張天雨楊廉夫鄭明德陳敬初同遊虎丘山次東坡舊題韻

孤峯峙平疇松杉夾飛嶺古劒池獨奇兩壁挿天井晃
疑將軍拜靈泉奔老耿深惟着蛟螭淨莫容蚪鼉昔試
盤陀鋒斬斲尋尺礦兆瘞銀鳧多氣結金虎猛至今王
霸業堪笑未全騁何如吾同遊俯仰無少哽小吳不滿
目坐覽三萬頃風高塔鈴語日昃蘿衣冷香積餉醅翻
法喜得雋永嗟嗟蛾眉僊嘗來弄光景踪跡留雪泥字

金匱山房集卷四
宇宙泡影九京倘可作當為折簡請

立秋登烏石山和幕府楊子承韻

海國山四圍繁華坐消歇樓觀沈夕陽鴻鴈下秋色水
邊無麗人石上存古刻感此莫歸遲秋露滿山白

車簇簇行

李陵臺西車簇簇行人夜向灤河宿隣家美酒斗十千
下馬飲者不計錢青旗搖搖出華表滿堂醉客俱少年
捧盃小女歌竹枝衣上翠金光陸離細肋沙羊成體薦

共訝高門食三縣白髮從官珥筆行
毳袍衝雨桓州城
白翎雀

淒淒幽雀雙白翎飛飛只傍烏桓城
平沙無樹巢弗營
雌雄為樂相和鳴君不見舊日輕盈舞
紫燕鴛鴦鎖老
昭陽殿風暄芍藥春
可憐露冷芙蓉秋
莫怨

凌波曲

吳蚕入繭雙鴛綺繡縷團花金鳳尾
昔時啼艷曉粧慵
滿眼春嬌扶不起
昔時解帶羅襪鬆
玉尖微露生春紅

翩翩白練輕舒卷，簾初翻，宮樣軟。三尺春雲入手輕。
一鉤新月，淩波淺，象床舞罷嬌無力。鴈沙踏破參差跡。
金蓮窄小，不堪行，獨倚東風玉階立。

吳姬曲

皎皎紅羅幕，高高碧雲樓。娟娟一美人，炯炯露雙眸。郎
居柳浦頭，妾住鶴沙尾。好風吹花來，同泛春江水。

洞房曲和劉致中員外作

峭寒暗襲雲藍綺，蛟帳惓惓夜如水。美人骨醉紅玉軟。

滿眼春酣不忺起幽禽關關喚霜曙金壁屠蘇溢香霧
有生只合老溫柔璧月長教掛瑤樹鴛鴦同心暗中結
滿意芳蘭煖紅雪癡雲騷雨自年年不管人間有離別
漢宮早春曲

女夷鼓吹招搖東羲和馭日騎蒼龍金環寶勝曉翠濃
梅花飛入壽陽宮壽陽宮中鎖香霧滿面春風吹不去
鞭却靈鼇駕五山芙蓉夜煖光闌干雞人一唱曉星起
四埜天開春萬里

新夏曲

紅泣香枯怨流水夜放撐龍千尺尾風生宮樹曉層層
涼綠一簾收不起烟乾寶鴨白晝清祝融緩轡行且停
薔薇花深霧冥冥碧窓睡起香滿肱

醉歌行

草生金谷韓信餓古來不獨詩人窮今朝有酒且共醉
明日一飲由天公紅樓弟子年二十飲酒食肉書不識
嗟予識字事轉多家口相煎百憂集廼知聰明能誤身

不如愚魯全天真百年簡憲曾何畏一日禮法能殺人
賢愚千載同一朽我為君歌君拍手流芳遠興不必論
且盡樽前一壺酒

鬻女謠

揚州嫋嫋紅樓女玉笋銀筵響風雨繡衣貂帽白面郎
七寶雕籠呼翠羽冷官傲兀蘇與黃提筆鼓叻趨文場
平生睥睨統袴習不入歌舞春風鄉道逢鬻女棄如土
慘淡悲風起天宇荒村白日逢野狐破屋黃昏聞嘯鬼

閉門愛惜冰雪膚春風繡出花六銖人誇顏色重金壁
今日饑餓啼長途悲啼淚盡黃河乾縣官縣官何爾顏
金帶紫衣郡太守醉飽不問民食艱傳聞關陝尤可憂
旱荒不獨東南州枯魚吐沫澤鴈叫嗷嗷待食何時休
漢宮有女出天然青鳥飛下神書傳芙蓉帳暖春雲曉
玉樓梳洗銀魚懸承恩又上紫雲車那知鬻女長歎歎
願逢昭代民富腴兒童拍手歌康衢

練湖曲

練湖七月涼雨通白水蕩蕩芙蓉紅芙蓉紅盡早霜下
鴛鴦飛去何匆匆菡塘女兒弄輕碧鳴榔聲斷無消息
清波小藻出銀魚落日吳山秋欲滴望湖樓上雲茫茫
鳥飛不盡青天長丹陽使者坐白日小吏開罌宮酒香
倚闌半醉風吹醒萬頃湖光落天影掛冠何日老江南
短褐綸巾上漁艇

終南進士行和李五峯題馬麟畫鍾馗圖

老日無光霹靂死玉殿咻咻叫陰鬼赤脚行天踏龍尾

偷得紅蓮出秋水終南進士髮指冠綠袍束帶烏靴寬
赤口淋漓吞鬼肝銅聲剝剝秋風酸大鬼跳梁小鬼哭
豬龍飢嚼黃金屋至今怒氣猶未銷髯戟參差努雙目
桃源行題趙仲穆畫

長城遠築阿房起黔首驅除若螻蟻誰知別有小乾坤
藏在桃花白雲裏桃花重重開白雲洞門鎖住千年春
男耕女織作生業版籍不是秦家民桑麻雞犬村村屋
流水門牆映花竹無端漁父綠蓑衣帶得黃塵入幽谷

主人迎客坐茅堂共話山中日月長但見花開又花落
豈知世上誰興亡明朝漁父歸城市回首雲山若千里
再來何處覓仙踪恨滿桃花一溪水

回風波弔孔明先生

大江東流日夜白已矣英雄不堪說朔風挾雨過江來
猶向磯頭濺腥血漢家神氣四海搖奸雄賊子相貪饕
二龍雌雄尚未決將軍戰骨如山高先生謀畧滿懷抱
坐視腥膻不為掃若非蜀主三顧賢終只如龍卧南畝

仰天一出摧奸鋒
綸巾羽扇生清風
許君義氣肝膽裂
兵樞盡在掌握中
赤壁樓船滿江夏
伏劔登壇唯叱咤
忠心耿耿天必從
烈火回風山亦赭
可憐一炬功未成
將星已墜西南營
力吹漢水灰未醒
嗚呼天命何不平
佇立磯頭盼吳越
感慨令人生白髮
先生雖死遺表存
大義晶晶明日月

送王循伯御史赴廣東僉憲時僕將回燕京

沙頭酒盡惜別離
江波日色浮繡衣
清溪柳花白蕩蕩

白下柳樹青依依秋雲雙隼嶺表去明月一鴈燕南飛
曲江水發願相憶莫遣鯉魚音信稀

高郵阻風

離家十日得順水不卸蒲帆一千里忽然今日風打頭
寸波寸水逆上流小兒造物不可測昨日南風今日北
黃頭束手蓬下眠盡日間看順水船順船得勢如馬走
相望招呼不回首長風破浪我亦曾順逆偶爾非人能
清明遊鶴林寺

青青楊柳啼乳鴉滿山爛開紅白花小橋流水過古寺
竹籬茆舍通人家潮聲捲浪落松頂騎鶴少年酒初醒
若將何物賞清明且伴山僧煮新茗

題茅山梅石道士卷

華陽洞裏羅浮仙袖攜冰雪梅花篇玉堂道士字一尺
紫清老人詩四聯夫何題詠到疎懶日短天寒歲云晚
獨憐空谷有佳人翠壁丹厓作屏板道人鶴氅顛倒披
芒鞋踏雪夜深歸莫將鐵笛山頭吹只恐石裂梅花飛

北上別鄭文學

朔風吹散鴻鴈羣
郎君上馬氣如雲
繞街鞭影拂河漢
毳袍貂帽文將軍
扶桑日出馬上見
金雞一聲天下聞
青燈細雨坐官舍
遙憶江南鄭廣文

為姑蘇陳子平題山居圖黃公望作

塵途宦遊廿年餘
每逢花月滿幽居
煙蘿聲磬走麋鹿
雪壑窈窕通樵漁
那如隱君不出戶
讀盡萬卷人間書
有生穹壤貴自攄
布韋軒冕奚錙銖
便當買山賦歸歟

石田老我扶犁鉏

揚帆松江甚駛西望吳山快而有作

秋風秋水清浮波片颿送舟如擲梭
篙師絕叫鳬鴈起但見流沫翔盤渦
汀蘆雪舞花婆婆淥淥淨已消菱與荷
青山蹀躞奔青驪倏忽過眼千羣多
放情盍買鱸鄉鱸侑以滿酌金叵羅
醉拍銅斗踏浪歌江行之樂其如何
中秋前二夜步至吳江垂虹橋盥漱
湖渚而歸倚蓬望月清興條然因成
數語

萬頃太湖風浪靜，玻瓈倒浸虹蜺影。
灩灩露滴金波流，一筇獨立秋雲冷。
步回長嘯倚蓬窓，月華正在青雲頂。
和韻三茆山呈張伯雨外史

碧桃花落蓬萊宮，銀屏甲帳圍春風。
冰簾捲水玉堂靜，白露滴月銀床空。
仙人夜酌九霞酒，手握北斗傾尊中。
梧枝落影鳳凰語，幽韻彷彿臨蒼穹。
伐毛洗髓天地老，火鼎夜出芙蓉紅。
呼龍洞口種瑤草，採藥忽遇松間童。
茆君自騎一虎去，猶聞珂珮聲丁東。
武華山人三載別

綠袍赤杖蒼髯翁淮南江上復相見落日淡淡天無窮
明朝稽首渡江去楚水清淺銀河通

再泊釣臺次鮮于伯機韻

富春山下桐江渡今古舟車南北路敢將一片利名心
重宿高人釣遊處客星去後無人住蒼山白水還朝暮
沙鷗也解避紅塵見人飛上滄洲去

秋江泛棹琴樂圖

抱琴船頭為誰鼓滿江秋色荻花浦神魚出聽掉尾舞

曲中鴻鴈起江濇
帝子降兮木葉下

叶

題蜀山驛

荒山孤館靜
老樹凍雲低
馬識來時路
詩存舊日題
郵亭一樽酒
客枕五更雞
到曉征鞍發
村村雪漲溪

宿因勝莊

薄暮雨初作
客愁行路難
長風吹短髮
平地走驚湍
雲氣千山暝
松聲五月寒
小窓僧話久
亦學坐蒲團

竹院亦幽雅
參禪愧未能
夢回僧枕雨
花落佛龕燈
風

響過牆竹窓搖掛樹藤裁詩題素壁聊爾寄吾曾

宿龍潭寺

客路青山下僧庵綠水邊
撞鐘驚鳥宿洗鉢動龍眠
未
有林泉趣先尋粥飯緣
上人喜留客夜雨佛燈前

次龍潭壁間韻憶新之區謙二臺節

故人久不見悵望思遲留
客路愁山虎漁燈散渚鷗
清
歌聞越調小艇入淮流
江市雖蕭索人家酒可謀
勤勞賢使者官馬未曾閒
夜醉誰家酒曉行何處山
莫

雲留客住落日望君還相憶尋詩處波濤洶湧間

江館寫事

曉市人烟合歸帆帶夕陽青山到江盡白鳥去天長越
女能淮語吳姬學楚粧栖遲未歸客猶著錦衣裳

謝龍江虛白上人雨中見過

山僧入城市歸路晚沈沈雨濕緇衣重燈明黑樹深泥
塗信行脚粥鼓急歸心應到松窓下新詩剪燭吟

用韻寄龍江

之子金山去，梅天霧氣沈。海風吹浪急，江雨入樓深。火盡無茶味，更長過燭心。明朝好晴色，應是寄新吟。

鐵塔寺寫懷

蕭條治城寺，杖屨日登臨。古木涼風急，空山落葉深。夜燈明鐵塔，秋雨暗松林。衲子清遊處，閒來獨自吟。

謾興

去年干戈險，今年蝗旱憂。關西歸戰馬，海內賣耕牛。元老知誰在，孤臣為爾愁。西風吹短髮，落日倦登樓。

賀陰君錫封贈

奕世陰家子居官邁等倫妙年全至孝餘祿養慈親致
敬歸榮早推恩勅署新綵衣映萱草日日北堂春

夏日遊鶴林寺

病餘乘野興來扣了翁房竹筍迸出地花枝垂過牆雨
聲鳴客枕雲氣暗僧堂歸路馬蹄滑風吹酒面涼

賀丘郡博持敬新修鎮江儒學

孔門新壯觀化雨過南徐紫殿風鳴鐸青燈夜讀書杏

壇翔彩鳳片沼躍銀魚館下諸生意如遊小石渠

花山寺投壺

落日花山寺秋風鐵甕城野人歡訟簡稚子說官清繫
馬巖花落投壺山鳥驚興闌山下路相送晚鐘鳴

次韻答奎章虞閣老伯生見寄

衮職須公稱江波屬我閒宦情魚鳥畔德譽董韓間黃
閣論思地金焦放浪山儘操舟泛泛空憶珮珊珊

病中書懷二首

半日閉門坐蕭然遠俗氛病中心似水門外馬如雲練
杵搗寒月香爐生晝薰興來覽明鏡太瘦小參軍
欲向江湖去何年理釣蓑城山入樓近隣竹過牆多春
甕浮紅酒晴天戲白鷺閉門且消病俗吏莫相過

病中寄了上人二首

鶴林四月路佳景集芳辰花落石橋水鳥啼山樹春吟
歸山似畫醉卧草如茵衲子清遊處何妨問病人
日長草木茂古寺樂芳辰野衲歸時晚山泉滴夜春清

金匱方集卷之六
卷四
吟聯石鼎病酒吐車茵不是天涯客林泉一故人

憶鶴林即休翁

城南鶴林寺幽境脫塵煩地僻藤花落窓虛貝葉翻池
塘浮野鴨竹樹掛山猿病起借禪榻高眠避市喧

登山

山上新亭好紅塵不可侵雨堦幽草合風徑落花深野
水浮晴色平田下夕陰城中公子少日日就登臨

送人之金陵

之子金陵去黃梅細雨天晚鐘近蕭寺野水急吳泉枕
有思家夢囊無買酒錢鳳臺動詩興落筆授蠻牋

題高秋泉詩卷

美矣高夫子能文武亦全橫琴彈夜月洗劍動秋泉酒
熟春如海詩閒日似年綸巾北窓下倦可枕書眠

野潛堂

高隱有深意情閒直萬金溪魚鮮作鱠竹筍長成林鶴
有還巢夢雲無出岫心讀書風雨夜燈火野堂深

題朱澤民畫雪谷曉行

市店衝寒出水厓，拂曙來登危。留虎跡，羅密隱猿哀。行
李一擔重，疎梅幾樹開。陽烏在何處，不照雪盈腮。

秋暮過吳值雨感懷

長嘯拂吳鉤，蓬窓起白鷗。江山同逆旅，風雨忽窮秋。樂
矣陶潛酒，高哉范蠡舟。一簪吾有雪，道路尚悠悠。

道中風雨

野水池塘滿泥塗，愁問程小車衝雨去。曲路遶山行，恁

地沾衣冷誰家壓酒聲飄零江海客汲汲事南征

初到閩

舊說榕鄉好來遊
鬢已絲片雲山對戶
一雨水平墀綠袖持
蕉葉丹林壓荔枝
城闌南有市燈火夜
眠遲

春遊

明日城東看杏花
叮嚀童子早將車
路從丹鳳樓前過
酒向金魚館裏賒
綠水滿溝生杜若
暖雲將雨濕泥沙
絕勝羊傳襄陽道
車騎西風擁鼓笳

春日侍駕遊香山

馬上遊人隔苑牆
天家未肯縱春陽
輕寒輕暖烏聲轉
無雨無風花命長
香殿雲煙隨鳳輦
交旂日月耀龍章
三三節近晴光穩
滿進虞廷萬歲觴

送吳宗師持旨先駕至大都并東順咨先生

扈蹕千官取次行
道人先踏雪泥晴
關南日暖龍顏近
嶺北風高鶴背輕
丞相早行霜滑馬
將軍夜宿火連營
一年兩度經過處
惟有青山管送迎

送南安鎮撫趙南山捧表西省

平生尺劍衆中師
臣子肝腸天地知
少壯金戈探虎穴
太平鎧甲網蛛絲
青山白髮尊前酒
紫塞黃雲馬上詩
今日又隨天表去
梅花香裏立沙墀

過李陵墓

降入天驕愧將才
山頭空築望鄉臺
蘇郎有節毛皆落
漢主無恩使不來
青草戰場雕影沒
黃沙鼓角鴈聲哀
那堪携手河梁別
泪洒西風骨已灰

擬李陵送蘇武

全是肝腸十九年河梁攜手泪潜然鐵衣骨朽埋沙磧
白首君歸弃雪氍毹海北牧羊無夢到上林過鴈有書傳
漢家恩愛君須厚剪紙招魂望塞邊

黃河夜送西臺御史張子壽時新除湖廣僉憲

愛君足跡半天下白簡清霜秋氣多帆影東南湖上去
馬蹄西北日邊過風波玉露仙人掌文彩雲機織女梭
自笑追隨遠遊客斗槎星夜下黃河

黃河夜雨懷烏延子方

風流俊逸四公子輕帽短衣過魯城
紫陌東風閒戲馬綠窓明月醉聞鶯
櫻桃花下春中酒沈水香回夜按箏
獨有黃河千里客短篷聽雨到天明

題高唐驛

三尺高唐帝子墳東風吹草綠
汙官中子母生前別天上簫韶夢裏聞
日暮白楊飛亂雪夜深黑氣結愁雲
小臣泣血應無補留與他年太史云

過廣陵驛

秋風江上芙蓉老
堦下數株黃菊鮮
落葉正飛楊子渡
行人又上廣陵船
寒砧萬戶月如水
老鴈一聲霜滿天
自笑棲遲淮海客
十年心事一燈前

送王御史時巡歷河道解舟金陵

淮南雨過好晴色
御史樓船動楚橈
楊柳清風秋解纜
瓊花明月夜聞簫
卧觀天上銀河浪
夢到雲邊白玉橋
後夕相思裁短詠
莫將書札付洪喬

遊鐵塔寺

江南地僻繁華盛古寺巍然鐵塔存
金屋月梅橫夜雨銅駝露草泣秋原
六朝王氣人何在幾度悲風鈴自喧
尚有他年舊時字摩挲一半沒苔痕

送外舅慎翁之燕京

揚子江頭柳色濃小船春雨去恁恁
青袍鐵甕龍門婿紫錦蒲帆鶴髮翁
晉府舊臣還塞北星門嬌客卧床東
明年亦是燕山客騎馬天街踏軟紅

春日登北固多景樓錄奉即休長老

東風吹樹散晴嵐，獨上層樓酒半酣。
拍岸潮聲來海外，滿江山色入淮南。
當時霸主分三國，此日吳禪老一龕。
惟有樓前舊時柳，年年三月色如藍。

還京口

黃鶴山頭雪未消，行人歸計在今朝。
城高鐵甕江山壯，地接金陵草木凋。
北府市樓開舊酒，南朝官柳識歸橈。
吏人莫見參軍面，水宿風餐鬢髮焦。

寄金山長老

老師召對金鑾殿喜動龍顏坐賜茶一日潮音起般若
九重春色上袈裟高風已入三天竺妙果重開五色花
渴想楊枝舊甘露何時一到病人家

鵬盡過練湖

獨倚牙檣數客程殘年風景足鄉情寒天半夜無人語
明月滿船聞鴈聲雲外好山如有約煙中野樹不知名
明朝烏鵲橋頭鬧應是人家出戶迎

丹陽普寧寺席上

紅白桃花開滿枝滿城微雨牡丹時因過古寺逢僧話
莫遣扁舟解纜遲客裏逢春多病酒江南到處半題詩
山川總是曾遊處一曲琵琶寫別離

送王郎還錢塘

王郎會我丹陽郭歸興錢塘不可留北固雪清山出畫
西湖春動水明樓草生湘浦行人遠日落吳山故國愁
安得與君二三月買花沽酒醉紅舟

宿玄洲精舍芝菌閣別張伯雨二首

一到茆山三日留，滿山風雨過中秋。
雲行松樹高低見，日落澗水東西流。
外史相邀登菌閣，此身只合往瀛洲。
它年叢桂結招隱，楚服願隨麋鹿遊。

竹樹忽聞乾鵲鳴，明朝歸計候新晴。
小樓無處有秋意，暗雨空山如海聲。
葉落窻虛開鶴步，峰回路合斷人行。
誰知昨夜玄洲客，剪燭題詩過二更。

登德興聚遠樓上有宋廟書

眉山仙去風流盡聚遠樓空月色寒波暖東風入樽俎
夜深北斗掛闌干幽花野草先靈香鐵畫銀鈎御墨殘
不見舊時雙燕子春風幾度捲簾看

九華山石墨驛

馬上行人思九華飄飄高興滿天涯排空峭石生玄笋
落日奇峯掛赤霞仙掌九秋傾露屑天河半夜碍星槎
雲中五老應招手呼我來遊太乙家

至龍潭驛

野草山花知姓字人生踪跡似浮萍
帆衝細雨空江白
鳥沒長淮遠樹青
今夜故人離水驛
明朝別酒盡沙瓶
匆匆又入丹陽去
莫鼓晨雞已候聽

登鳳凰臺

鳳凰臺上望長安
五色宮袍照水寒
彩筆千年留翰墨
銀河半夜掛闌干
三山飛鳥江天暮
六代離宮草樹殘
始信人生如一夢
壯懷莫使酒盃乾

鳳凰臺懷古

鳳凰一去不復返竹實桐花空滿庭
暮雨樓臺連野寺
秋風鼓角動邊城
水邊萬井吳煙白
天外三山楚樹青
不見騎鯨李公子
幾回惆悵此中行

次王本中燈夕觀梅

翠禽偷夢出南園
綽約冰姿傍綠尊
冰鏡玉釵浮翠影
風簾銀燭照粧痕
粉香微潤無人見
素質多寒藉酒溫
不似海棠春睡去
西樓月落已黃昏

謝人惠木犀

霜高落葉如雨急有客敲門送木犀夜月不留藏兔影
秋風失却掛蟾枝雲中仙子金華墜天上吳生玉斧移
寄語鳳臺老居士旋磨香露寫新詩

奉和鄧善之學士贈陳堯夫教授之作

巴西夫子鄧學士文彩珊珊玉珮琚天上已無金馬詔
人間空有白鵝書雲窻春透松花濕月殿秋高桂影疎
不見青山埋骨處水晶宮裏是幽居

過江東驛次王侍御韻

政事文章王侍御朱簾捲雨送將歸江東春色分銀篆
馬上清風吹繡衣澤國水香魚藻動硯池春暖墨花飛
至今吳楚經行處夜夜奎光繞太微

九日登石頭城

九日吟鞭聚石頭翠微高處倚晴秋西風不定鴈初度
落木無邊江自流兩眼欲窮天地觀一盃深護古今愁
烏臺賓主黃華宴未必龍山是勝遊

寄楚堂

憶昔相逢春莫天，道傍楊柳盡飛綿。
池魚出水將三尺，竹笋成林又一年。
高士已成招隱賦，行人未辦買山錢。
堦堂燈火清秋夜，何日聯床聽雨眠。

寄同年友

憶昔同登龍虎榜，思君一度一悽然。
三年歲月紅塵裏，萬里關河白鴈前。
天上故人淮水隔，江南老樹楚雲連。
不堪回首知何處，聞說年來海變田。

寄茅山謝舜咨

昇龍觀裏謝道士一入茅山不肯回白髮笑人年百歲
青天容我日千盃已知聖主求方士未必先生下釣臺
每向石頭城下望順風應寄鶴書來

送王幼達之北京

五色雲煙百尺臺王郎獨步近蓬萊江湖水落魚龍上
天地秋高鴻雁來北苑芙蓉風慘淡西宮楊柳月徘徊
此行正及扶桑日應獻堯庭萬壽杯

昇龍觀夜燒香印上有呂洞賓老樹精

蘭風吹動呂仙影老樹槎牙吐暮秋夜靜藥爐丹火現
月明神劍夜光浮已知浩氣無窮盡不到心灰未肯休
鐵笛一聲吹雪散碧雲飛過岳陽樓

送湖洲鼓元明道士入茅山

道人居住碧湘灣清夜月明搖珮環出門倒拄九節杖
辭家却入三茅山開籠放鶴橫江去寫檄收龍帶雨還
便擬訪君吹鐵笛青松白石往來間

送崔知印之江東

金陵市上多驄馬白下橋頭喜識君
玉佩清搖烏府月
篆銀紅帶赤城雲
買舟又過江東去
離笛難禁柳外聞
獨有無媒送行者
依然野鶴在雞羣

題先春卷上有蕭滕王三學士贊

番陽山人春擁門
玉堂學士墨翻盆
屋前屋後雪千樹
枝北枝南月半痕
寒夜老龍搖玉骨
霜天瘦鶴弔冰魂
未經調鼎休惆悵
會見留酸到子孫

寒夜即事次韻呈許榮達

呵筆題詩逸興舒
翠簾寒重捲鰕鬚
春分采石仙人酒
夜讀茅山道士書
箭刻未移寒漏淺
江聲漸少夜潮枯
閉門歲晚仍多事
歸夢無端遶故廬

鶴骨笛

九臯聲斷楚天秋
玉頂丹砂一夕休
楊柳肯忘枯朽恨
梅花吹盡古今愁
魂歸遼海身如蛻
曲破江城月滿樓
惆悵玉人三弄罷
杳無消息到揚州

天燈

金定四庫全書
卷四
高挂長繩百尺餘直飛紅燄上天衢一色春髓蒸元氣
九轉靈丹鍊太虛綵鳳抱成吞日卵赤龍銜出照天珠
高高不受飛蛾撲長使凡人仰面吁

贈欽師

隨緣駐瓶錫頂雪已差差莫道禪非學心空不廢詩

畫二首

樹色濃堪掬癡嵐撲雨秋道人巖下住屋角掛奔流
草迷蒼耳子烏弄白頭翁十里湖山樹平分杳靄中

和閒閒吳真人二首

幾度驅車上京國五更歸夢遶雲林
丹爐火伏虎晝臥石鉢雲寒龍夜吟

天上神仙吳子晉丹鳳樓前駕鹿車
紅門下馬見天子袖有一卷養生書

興聖寺即事三首

宮堦白日杏花深院朱簾燕子飛
回首人間春又老將軍白馬幾時歸

御廚香動晚分羹
七寶玻璃拌承白
面內官呼小字
隔簾傳旨賜中丞

二月深宮花似錦
柳絲垂地怯風吹
御堦春水多三尺
丞相遊湖太液池

遊會仙宮

霏霏涼露濕瑤臺
半夜吹簫月下來
山外春風將雨過
滿庭撩亂碧桃開

題范陽驛

長路風寒酒力醒馬頭歲月短長亭凍雲欲雪風吹散
望出西山一半青

道傍萱花

萱草花開山路頭內家景致落林丘風塵不改好顏色
應與行人消百愁

書澮溝楊氏壁二首

故人家在河邊住吏部書從天上來愧我掛冠歸去晚
柳花飛盡棟花開

楊柳人家春晝長
落花亭院燕飛忙
買魚沽酒黃河上
傲殺南風三月強

彭城雜詠

英雄去盡山河在
城郭荒涼草樹迷
過客無心弔千古
落花風雨聽鶯啼

夜過白馬湖

春水滿湖蘆葦青
鯉魚吹浪水風腥
舟行未見初更月
一點漁燈落遠汀

高郵至邵伯二首

移棹偏驚臨水鴈過淮時買出鱖魚有時得句無人和
風雨寒窓夜讀書

幾度秋深未到家滿湖開遍水紅花遠人日日頻中酒
明月扁舟索買瓜

題淮東王廉訪清涼亭

主人曾次洗冰雪深夜金山月湧波二十四橋秋水白
淮南八月瀉銀河

次和清涼寺長老韻

緇衣送酒一壺冰
霜蒂懸香九月橙
酌酒破橙天色晚
桂花樹下出銀燈

秋江橫笛圖為維揚蘇天爵題

楓葉高低山遠近
月明霜薄楚江澄
何人吹笛孤舟外
莫是蘇仙過廣陵

過江後書寄成居竹

揚州酒力四十里
睡到瓜洲始渡江
忽被江風吹酒醒

海門飛鴈不成行

揚子江送同志

滾滾諸公立要津一波纔動總精神
滿江風浪晚來急誰似中流砥柱人

夜發龍潭二首

孤舟一夜發龍湫水逆風回上石頭
暫泊沙洲過夜半臥聽鐘鼓是昇州

船頭夜靜天如水渡口潮平月在江
燈影搖波風不定

老龍吹浪濕蓬窓

江浦夜泊

千里長江浦月明星河半入石頭城棹歌未斷西風起
兩岼菰蒲雜雨聲

金陵道中遇雨寄功夫父光國五首

出城便喜風景好淡水穿沙生細粼多謝山雲飛白雨
應教行客洗紅塵

平生夢想金陵道此日偶然身自來應是山雲喜詩客

野花滿路雨中開

夾道長松風聒聒滿溝亂石水泠泠斷雲銜雨溪南去
失却長山一半青

騎馬何人衝白雨乘輿有客看青山出城自謂身無事
衝雨看山未是閒

夢想江南今日到肩輿過處落花風行人五月金陵道
石竹花開白雨中

寓臺城寄吳宗師

金陵城外鳳凰臺
夜夜吹簫獨自來
不見仙人倚歌和
白鶴飛下還飛回

雪中飲昇龍觀

銀燭春船剪夜寒
道人鶴氅紫霞冠
山瓢未盡金陵酒
玉樹飛花滿石壇

和王本中直臺書事

百尺臺中誰夜直
西廊斜月照東廊
五更夢覺春寒甚
簾外梨花滿樹霜

今日短衣鞭瘦馬每慚同輩說登科
近曾夜直南臺上
學得吳兒白苧歌

昇龍觀九日海棠杏花開二首

九日江南風日暖
海棠花間杏花開
昇龍觀裏春光早
為是先承雨露來

鼎湖龍去御床空
輦路花開舊日紅
九日人間春色早
不堪草木見秋風

贈彈箏者

銀甲彈冰五十絃
海門風急鴈行偏
故人情怨知多少
揚子江頭月滿船

寄諸臺掾二首

天上霜臺聳百尋
諸郎不為簿書禁
遙知閒倚東廊柱
看盡楊花過綠陰

天上故人頻寄語
江南倦客只吟詩
梨花開盡東廊雪
又過梅黃杏熟時

贈謝舜咨羽士

揚子江頭春水動三茅洞裏碧桃開
道人不管天南北
夜半月明騎鶴來

送武侍御朝章

楓林湛湛草斑斑御史青驄響玉環
日暮酒醒人已去
不堪回首見青山

次程宗賜二首

一冬雨雪天涯客千里雲山馬上詩
記得小紅樓畔夢
杏花春雨早寒時

揚州正月雨如絲江上梅花已盡時誰識能詩老何遜
曉寒明鏡撚吟髭

贈來復上人四首

北口雪深氊帳暖紫駝聲切夜思鹽上人起飲黃封酒
可勝醅醕乳酪酣

燕山風起急如箭馳馬蕭蕭苜蓿枯今日吾師應不念
毳袍衝雪過中都

手持一鉢走京華乞食王侯宰相家今日歸來如昨夢

自鋤明月種梅花

五雲樓閣碧玲瓏
口吐蓮華入紫宮
十二珠簾捲秋月
霏霏涼露下梧桐

戲王功甫

王郎酒醒倚脩竹
雪後重簷擁毳衣
亦有江南未歸客
青山影裏馬如飛

戲贈王本中柳枝詞

日高燕語捲簾遲
獨倚東風看柳枝
三月柳花飛欲盡

遠人涼露未歸時

城南偶興二首

桃杏花開紅映人
池塘水暖綠粼粼
典衣沽酒入城去
報道江南二月春

斷橋芳草生合路
隔水楊花飛度城
客裏不知春早晚
年年盃酒過清明

宿洞神宮春曉書事

道人睡起窓月白
飯熟黃梁雞亂啼
門外賣花聲已過

街頭春雨竟成泥

冶城三月晦日

雨前雨後鶯亂啼
城南城北花交飛
江南兒女裁苧衣
燕京遊子何時歸

寄浙東聶經歷

一片暮雲千里隔
石頭城上望天台
夜深婺女明如鏡
鴈蕩山前鴈盡回

春日偶成二首

歸到江南繞一月短衣匹馬又京塵明朝擬下江東去
晴日柳花飛送人

水遠池塘朝飲馬月明蒼栢夜鳴烏年來南北幾千里
却笑書生無遠圖

春望

丹陽郭裏春濛濛騎馬出郭詩思濃江南二月風雨過
梅花開盡杏花紅

春暮

柳花撲簾春欲盡
綠陰滿窓鶯亂啼
祇愁明月送春去
風雨滿林聞竹雞

端居書事答翟志道知事見寄韻二首

短褐詩人瘦十分
平生不作送窮文
幾時結屋孤山下
為覓梅花種白雲

瘦馬春城曙色分
長年奔走愧移文
幾時黃鳥山房下
松火茶鐺煮白雲

鎮江寄王本中臺榭

梅花落盡空吹笛正月半頭思遠人兩岸好山青不斷
一江微雨鷓鴣春

和友人招飲

山人開甕滿園香短簡招呼白面郎瘦馬踏泥春巷去
一林煙雨杏梅黃

寄即休翁三首

苔老應無屐齒痕舊遊歷歷眼中存秋深南國行人少
落葉蕭蕭滿寺門

北窓終日對竹坐老却叅軍不入城秋還山風多落葉
隔林疑是馬蹄聲

鶴林老子久不見應是山門長綠苔幾日城南風雨過
村村無處不黃梅

未歸

白岩老子城中去驄馬遊人寺裏來城外風流城裏少
岩花落盡野花開

夏仲書景

堦前萱草花開盡堂上主人消百憂門外涼風吹樹急
江南五月似涼秋

病起戲筆奉答御史王文休

江南倦客好清齋煉得身形瘦似梅不到清溪三四日
藕花無數水中開

偶成三首

買魚沽酒消長日高樹清風燕子閒却倚天南望天北
隔江青處是誰山

自許癡兒了公事肯教俗子議清流明日醉騎五花馬
吹簫踏月過揚州

疎簾日午花陰直高柳清風語燕閒默坐焚香點周易
軟紅不到小屏山

層樓即事

浴罷焚香掃閣眠過牆新竹翠娟娟半空雲氣層樓暗
四月江東欲雨天

納涼

桂枝葉密陰覆地
梔子花開香滿廊
古寺納涼過半日
葛衣石枕竹方床

秋夜聞笛

何人吹笛秋風外
北固山前月色寒
亦有江南未歸客
徘徊終夜倚闌干

寄鶴林休上人

上人才思塞曾次
強欲禁之無不鳴
一日相望吐奇句
滿林光彩照山精

宿丹陽普照院

閉門三月聽秋雨酒醒丹陽客未歸
明日新晴練湖去
藕花無數落紅衣

燈火僧房伴寂寥小涼天氣入青袍
夜深為倚西廊柱
藥杵一聲秋月高

逢景顏

市酒瀉糟清似水湖魚出網白如銀
買魚沽酒丹陽郭
落日江南逢故人

贈歌者號梅芳二首

露骨江南冰雪肌
斷腸塞上錦綉兒
春酸一點留無住
却是成陰結子時

玉骨冰清過歲寒
可憐蜂蝶已成團
如何不解相如渴
散盡江南一點酸

寓栖雲四首

一尊未盡有餘興
二子不來無可人
滿地鳳仙落紅雨
江南八月似殘春

盆池萬點浮萍草
秋雨欲來無定踪
好是詩人漂泊態
丹陽郭裏夜聞鐘

瀟瀟風雨客心孤
且盡尊前酒一壺
夜半酒醒愁又到
一聲白鴈下平湖

白面道人門不出
晚涼倚樹聽秋風
最憐八月江南好
老鴈叫雲霜葉紅

題隱上人房

練湖水霜眼碧坐
對茅楹山色青
白日散花天女降

夜深鐘磬尚聞經

寄金壇元魯宣差行操二年兄

蒼茫迴野凍雲低
馬上遙山玉四圍
自是詩人有清氣
出門千樹雪花飛

宿陵口寺

西風落葉陵口寺
薄暮鐘聲送夕陽
酒醒不知過夜半
開門滿地月如霜

題鄭谷驛

誰處江東鄭老家自鋤谷口種煙霞
遠山三月多歸思
晴日東窓見杏花

贈張道士

道人新帶竹皮冠頭上星搖北斗寒
一夜涼風吹髮亂
半窓鶴夢遶琅玕

題呂城葛觀二首

諸葛仙翁七十餘呂蒙城下築幽居
來從方外求丹訣
且乞人間教子書

呂公城下葛仙家
洞府春深鎖暮霞
過客不知天畔月
小風吹落鳳仙花

延陵曲

延陵廟西落日低
延陵廟前春草齊
千金公子去不返
淡雲苦竹斑鳩啼

宿延陵昌國寺書于上人房二首

舊日延陵客
子家只今門
巷滿桑麻
姑蘇回首神遊處
無限春風野薺花

東風吹水碧粼粼雨過村村野色新
小艇延陵廟前去
荷花開盡野塘春

謝人惠茶

送茶將軍扣門急驚覺秋深夢一窓
半夜竹爐翻蟹眼
只疑風雨下湘江

題李薊丘畫松

平生恨不識遵道忽見此圖如夢間
安得羲之九泉底
枯林風雨似初還

吳僧子庭古木竹

歲寒古木性所愛
況有此君初附之
江湖眼明世無幾
太息不生元祐時

和韻寄吳城陳敬初

吳江酒熟照行人
春江小雨波粼粼
一樽不盡忽晴日
江頭柳花撩亂春

席上次顧玉山韻

畫牆班鳩啼綠樹
白日紫燕穿朱簾
晝長深院弄瑤瑟

吳姬十指行春織

去吳留別于壽道陳子平諸友

吳堤楊柳雨霏霏四月猶寒總夾衣
此去孤舟無好伴空江惟見白鷗飛

一尊判袂闌閤城莫指青山管送行
芳草綠波千萬里不聞杜宇也傷情

季夏遊杭靈隱諸峯

佛國羣山快我遊煙霞踏破幾層層
三天竺畔全無暑

六月松陰尺五冰

秋日寓錢塘

小樓一榻錢塘客
況味淒涼序屬秋
安得江淹賦予筆
因而書作半生愁

青松林

一點兩點過雲雨
千株萬株臨路松
五月江南好風景
行人馬上不從容

宿徑山寺二首

野人一宿徑山寺十里松聲半夜潮何日掛冠尋舊隱
山中應有故人招

山中酒熟客初至正是東林月上時痛飲不知過夜半
深山風露下松枝

題竹院壁

門外好山青入戶堦前芳草綠侵簾山僧應笑遊人醉
頭上花枝壓帽簷

書高賢坊

穿松翠滴青驄馬過雨涼生白苧衣三月已過四月半
柳花開盡棟花飛

常山紀行

綠陰門巷掩柴扉五月江南笋蕨肥何處清香來馬上
滿山開遍野薔薇

山溜涓涓山雨晴村南村北鷓鴣鳴行人五月不知倦
喜聽農家打麥聲

石羊華表草離離古木殘陽立斷碑馬上不知何代塚

鷓鴣飛上野棠枝

石壁飛泉作雨聲
野花滿路酒初醒
吾儂何事不歸去
一帶長山馬上青

蠶婦攜筐入桑柘
野猿抱子掛松蘿
綠陰門巷客呼酒
黃犢山村人唱歌

過浦城

人家雞犬隔癡嵐
城郭微茫見塔尖
一片輕雲籠馬首
熟梅時節雨纖纖


到閩二首

朔雪蠻煙總備嘗
白頭纔到荔枝鄉
浮雲不阻懷賢意
得掃寒蕪拜紫陽

潮水通城蚶蛤肥
萬株紅荔艷晴暉
守臣只恐山飛去

高築閨闈鎖翠微

雁門集卷四



總校官庶吉士臣張能照

校對官編修臣曹城

謄錄監生臣劉鳳桂